

Nicolò Sordo

TAJARSE FORA

Da una (malsana) idea di Enrico Ferrari

PERSONAGGI

BEPI
SISSO
SCIENZA
MAMMA

BEPI, seduto, con una tovaglia di tela cerata sulle gambe, finisce di mangiare da un piatto di plastica, sta guardando la televisione.

Poi fuma una sigaretta e si accascia su di sé.

È morto.

Sto qua sentà a taola son mi. Son morto ancò.

No ho poduo farghe gnente. Gnanca finir de fumar.

Dopo magnà... e ho anca magnà mal parché me ne son fato da par mi.

Me mama no la ghè pì de testa, figurate metarse en cuzina... no l'ho gnanca saludada.

Son svaniò sul pi belo. L'è sempre sul più belo che finisi le robe.

Eremo quasi rivadi ala meta.

L'è stà proprio na bela sopresa.

Me mare l'ha sempre dito che se sarìa morto vecio sarìa morto dal fredo.

Ma no so mìa morto vecio... son morto zoeno e belo.

La roba bona che savea far la ghera.

Cagaa pensieri e no pensieri qualsiasi, pensieri de libertà.

Tuti se spetava da mi el gran discorso final quando saresemo diventè indipendenti... ma mi non farò quel discorso, e nisun pronuncerà 'ste parole che le dovea ricordarne ala storia...

BEPI piega un foglietto e lo mette in tasca. Inizia a cantare.

PAR TERA SVANIÒ TRA LE ME CARTE E I ME SOGNI
PAR TERA SVANIÒ SENSA TANTI BISOGNI
MAGNANDO EN CUZINA VARDANDO LA TELEVISION
PAR TERA SVANIÒ SENSA GNANCA LAVARME
SENSA GNANCA VANTARME SENSA GNANCA SALUDARNE

VAO AL'ESTERO NE I'ADE DEL VENETO
MI CHE SO INDIANO ME SENTO MORIR
VAO AL'ESTERO NE I'ADE DEL VENETO
MI CHE SO INDIANO ME SENTO MORIR

Entrano SCIENZA e SISSO. Si accorgono che BEPI è morto.

SISSO: Eh... el Bepi nol rispondi mia...

SCIENZA: Come mai?

SISSO: *(ride)* El se sarà fumà qualcosa. *(a BEPI)* T'avea dito che te gavee da aspetarne! *(tira una sberla a BEPI)*

SCIENZA: Dai, Bepi, sveete che te ghe da pronunciar "el discorso"... e gavemo en laoreto da far...

SISSO: Ala faccia del laoreto: gavemo da far El Laoro! El nostro laoro...

SCIENZA: L'unico laoro che savemo far...

SISSO: Conquistar el mondo!

SCIENZA e SISSO si siedono e aspettano di trovare una soluzione.

Ghe da dir che vivo proprio en en bel posto... s'ì: cole vigne, i fossi par tera, la nebia... s'ì: na ciesa, en tabachin e na strada che te rosega le rue de la machina. Sa vuto de più? Senza gente che te rompe i cojoni. Stemo ben chi. Dovemo solamente taiar fora sto toco de mondo... L'unica solussion: taiar. Taiarne fora. Gnente armi, gnente de gnente. Roba vecia, xà usada...

SCIENZA si alza e comincia a camminare su e giù.

SCIENZA: Sa femo senza el Bepi? E le so parole?
SISSO: E la rivolta armata? E la droga e le done?
SCIENZA: A che no semo mia la Mala del Brenta... semo gente onesta noantri. Gaven da ciapar en cortel che taia e taiar la tera intorno a noantri cos'ì sten chieti. (*Guarda Bepi*) Pensa al Bepi che no risponde mia. Ciama qualchedun!
SISSO: Ciamo so mare? L'è de là...
SCIENZA: No, no sta mia ciamarla: l'è meza sorda e meza mata...

Entra la MAMMA in camicia da notte.

MAMMA: Cosa succede qua? Si può sapere cosa succede qua? Ci sono i ladri? Ah, ladri! Che vi mando via!
SCIENZA: Siora, no semo mia i ladri.
MAMMA: Come no siete i ladri? Se vi vedo sempre girare per di qua...
SCIENZA: Semo i amici de so fiol.
MAMMA: Sono stufa di tuti questi zingari che girano per casa, portano via pensione, portano via tuto...
SCIENZA: Siora, noantri la pensemo come ela. Sen vegnui qua par quela.
MAMMA: Siete venuti qua derubarmi?
SISSO: No, semo amici de so fiol, ghemo dito. Del Bepi, te ricordeto del Bepi?
MAMMA: Di chi? Io no volio sapere niente.
SCIENZA: De Bepi, so fiol.
SISSO: So fiol...
SCIENZA: El sa endormensà sul taolo.
MAMMA: Ah, sapete, quando no sa cosa fare dorme. È melio che lo lasiate in pace...

La cosa che me sempre piazua de me mare, anca se l'è na vecia mata, l'è che l'ha m'ha sempre difeso: l'ha ma difeso dai tempi dele scole, no l'ha mai perso n'ocasion... e s'ì che mi ho fato anca le mie... quando la savarà che son morto...

MAMMA: Lasiatelo dormire e no preoccupatevi...
SCIENZA: Siora, galo dito qualcosa so fiol prima de endormensarse?
MAMMA: Cosa?
SCIENZA: Alo dito qualcosa?
MAMMA: S'ì ha deto che andava a concimare l'orto.
SCIENZA: Che concimar l'orto...
SISSO: Conquistar el mondo!

La MAMMA esce.

SCIENZA: Proa a girarlo...
 SISSO: Ah, mi i morti no i toco mia... ciama l'ambulansa!
 SCIENZA: No poso mia ciamar l'ambulansa, ensemenio. E se dopo i pensa che sen stè noantri?
 SISSO: Ma mi no voleva mia coparlo... Bepi, perdonane...
 SCIENZA: Sisso, ma no l'emo mia copà noantri... Sisso, dai sta' fermo...
 SISSO: Ma sì Sciensa che l'emo copà noantri... mì l'ho copà... go tirà en sciafon...

Entra la MAMMA.

MAMMA: Chi è che è stato copato?
 SCIENZA: Gnissuni, siora, gnissuni...
 MAMMA: Ho leto sul giornale che gira parechia criminalità.
 SISSO: Ah no, siora, finché ghe semo noantri l'ha pol star sicura.
 MAMMA: Voi siete polizioti?
 SISSO: Ma che polisioti... noialtri ghemo un compito importante...
 SCIENZA: Vuto tasar... se sta chi la parla en giro...
 SISSO: Ah, sa vuto che la diga... *(la MAMMA esce)* adesso togo su en cortel e vao a tajar la tera...
 SCIENZA: Mochela. Sa vuto tajar... Sisso, no poden mia farne scapar sta ocasion qua...
 SISSO: Che ocasion?
 SCIENZA: Cossa gavemo qua?
 SISSO: En cortel, na toaja, na vecia stracampia e, *(pausa)* en cadavere...
 SCIENZA: En cadavere, Sisso, gavemo en cadavere...
 SISSO: Dai, Sciensa, no l'è mia en cadavere, l'è el Bepi...
 SCIENZA: Adesso el Bepi l'è un cadavere... e quindi ghemo un cadavere.
 SISSO: *(piangente)* Elo en cadavere?

L'è proprio vera che i amici i se vedi nel momento del bisogno. E mi ghe son servìo par tante robe: gò trucà i motorini, gò sempre oferto da bear, i ho fati dormir a casa mia, a farghe paura ai marochini... emo anca pensà a come vivar mejo e ghavevimo progeti par el futuro... Anca da cadavere, poso esar utile. Non se se tira indrio mai. Voi propria vedar sa l'è bon de enventarse el Sciensa. Tajarse fora... no l'è mia facile tajarse fora...

SCIENZA: Ne femo avanti col cadavere e ghe dizemo che se no i ne taja fora el nostro paese e no i ne lasa en pace... el copemo!
 SISSO: Ma se l'è za morto...
 SCIENZA: Ancora mejo, no, ensemenio!
 SISSO: Me sa che el Bepi no'l saria mia massa d'acordo...
 SCIENZA: Ormai l'è morto, no'l pol pì dir gnente...
 SISSO: L'avea dito gnente armi, gnente de gnente...
 SCIENZA: Ala gente bisogna farghe paura... se te vè là con en cortel da cuzina che paura ghe feto... noantri nemo là con en morto en brazo...
 SISSO: Ma el Bepi no'l volea farghe paura a gnissuni... el volea solo star chieto.
 SCIENZA: Sa ghè? Ghetto paura che el se enrabia e che el torna endrio a coparne?
 SISSO: Se te fusse morto ti al posto suo, avarassene zà catà na solussion.

Entra la MAMMA.

MAMMA: Giovani volete bere qualcosa? Aspetate che lo meto a leto...

SCIENZA: No la se preocupa. Ghe lo metemo noantri en leto...

MAMMA: No ce lo meto io, che lui ha le sue abitudini... credete voi... guarda qua come si deve ridure a forza di lavorare. Se mi muore di freddo il mio unico filio...

SCIENZA: Gò dito che el metemo en leto noantri... ela la se riposa, la se varda la television... *(senza farsi vedere dalla MAMMA che inizia ad uscire)* Sisso, vardaghe nelle scarsele...

SISSO: Aspeten almanco che la vaga de là...

SCIENZA: No se pol pì aspetar. El narà lasà en bilieto, un fojo con su scritto qualcosa.

SISSO: Ascoltame mi, aspetta...

SCIENZA: Ti te fè quel ghe digo mi. 'deso che il Bepi nol ghe più, comando mi. Vardaghe nele scarsele dele braghe, dela camiza, nele mudande. Mi vao en camara a vedar se l'ha lassà el discorso.

SCIENZA esce. SISSO fruga nelle tasche di BEPI.

SISSO: Com'ela Bepi? L'è un po' che no te vedo. Ara che te me manche de zà. Com'ela li all'estero? No vedo l'ora de vegnarghe, tanto ormai ti te sé li. Chi no so più sa far. En do narò la dominica dopo magnà? Me despiaze... no volaria farte questo, ma gò da farlo mi... el Sciensa, l'è 'no stronso, no voi laorar con lu.

Volaria che te tornesse endrio e te potese ti farne sentir dala to viva voce le parole che faria tremar tuto el resto del mondo.

Quel là te vol usar par farghe paura ala gente. No l'ha capio, quanto l'è importante par noialtri sto tajo... Bepi, prima quando ho dito de le armi e le done schersaa... Te darè che mi e quel de là riusiremo a tajarne fore, come ne serene diti. In to onor.

SISSO trova un filietto nella tasca di Bepi. Entra SCIENZA.

SCIENZA: Sa fetto?

SISSO: Mi niente.

SCIENZA: Parleto coi morti?

SISSO: Mi no... pensaa a voce alta.

SCIENZA: Eto catà qualcosa?

SISSO: Gnente... gnente de gnente... e ti?

SCIENZA: Batarìa. Giornaleti.

SISSO: Scomensio a pensar che no'l s'avesse gnanca lu come far a tajarse fora.

SCIENZA: Proa a cavarghe le scarpe. Ci sa... magari el tegni qualcosa sconto là.

SISSO toglie le scarpe a BEPI. Entra la MAMMA.

MAMMA: Disgraziati! Cosa state facendo?

SCIENZA: Siora, el Bepi el nà domandà de cavarghe le scarpe...

MAMMA: Di tolierli le scarpe?

SISSO: Ela vala en leto con le scarpe?

MAMMA: Dipende dal freddo. Mio filio ha sempre freddo... non li si deve toliere niente... deve andar leto così...

SCIENZA: Siora, ma ela saveela sa'l g'avea en mente de far so fiol?

MAMMA: Ah, guardi, mio filio era uno a posto, sa crede lei...
 SCIENZA: Ma sì che l'era uno a posto...
 MAMMA: Ce ne vorebero di più di ragassi come mio filio.
 SCIENZA: Magari... fusse pien el mondo...
 SISSO: Siora, el volea ciapar en cortel...
 MAMMA: Un coltelo?
 SCIENZA: So fiol el volea tajar fora el nostro paeseto dal resto del mondo...
 MAMMA: Che no venga stranieri, zingari...?
 SISSO: Braa!
 SCIENZA: E che no se paga par i erori dei altri... coi nostri schei. Questo el volea far.
 MAMMA: Che bravo. L'ho sempre deto che l'ho cresiuto bene, intelligente...
 SISSO: Ah sì, de noantri l'era l'unico intelligente.
 SCIENZA: Intelligente quel lì? Tazi, ensemenio.
 MAMMA: ... ma la profesoresa di geografia l'ha preso in sinistra parte...
 SCIENZA: Siora, so fiol galo lassà dito come el pensaa de tajarse fora?
 MAMMA: Sì l'ho visto che un coltelo in mano si esercitava a taliare...
 SCIENZA: A tajar cossa?
 SISSO: Na carta geografica? El dividea el mondo...
 MAMMA: Si taliava un panino.
 SISSO: Eto visto che gavea endovinà? L'è che ti no te me ascolte mai... dai ciapemo en cortel e nen. Par l'onor del Bepi.
 SCIENZA: Sì... e da che parte tajen?
 SISSO: En longo.
 SCIENZA: E se tajessene en largo?
 SISSO: Tajemo en largo. Va a tajar ti che te se el capo.
 SCIENZA: Secondo mi el Bepi l'avea scelto ti.
 SISSO: No, non sarìa gnanca bon... te el sé...
 SCIENZA: E se l'avesse scelto... ela? Siora...
 MAMMA: Dica, giovane...
 SCIENZA: Gala en cortel che taja en casa?
 MAMMA: Certo, ce l'ho nela credensa di là...
 SCIENZA: La vaga a torlo.

La MAMMA esce.

SISSO: Ma seto fora? Mandeto la vecia a far el nostro laoro?
 SCIENZA: El nostro laoro? La mando a far el to laoro. Che no te ghè gnanca el corajo.
 SISSO: Mi no gò gnanca el corajo? Pensa se el ven a saver el Bepi che mandemo so mama...

La MAMMA entra.

MAMMA: Ecomi. Si deve taliare la carne? Questo qua è un coltelo da carne.
 SCIENZA: No, siora. La gà da tajar la tera tuta entorno al paese.
 MAMMA: Ah no si può... si rovina. Questi qua sono colteli di prima sielta...
 SISSO: Eto sentìo no la pol mia narghe ela.
 SCIENZA: Tazi. Vedemo almanco sa l'è bona de tajar.
 MAMMA: Lo tenga lei il coltelo, perché è pesante... col bracio che mi ritrovo... son brava che sono ancora viva...
 SISSO: Sa vuto farghe proar a tajar?
 SCIENZA: *(indicando BEPI)* En bel toco de carne.
 SISSO: Ma seto semo?

SCIENZA: Tanto ormai l'è morto... bisogna proar se l'è bona de tajar. Siora, la varda che barba che gà so fiol...

MAMMA: Gliel'ho sempre deto che i barboni no piaciono ale done... se una deve darli un bacio...

SCIENZA: La ghe daga na ripasadina ala barba...

MAMMA: Ah no, no... mio filio è grande deve imparar far da solo...

SISSO: Sì, la gà rason anca ela... arda l'è mejo che la me daga quel cortel.

MAMMA: Ah, non ce lo do a lei... questo qua è mio, mi serve per la carne...

SISSO: La se fida siora, che l'è mejo che la me le daga a mi...

SCIENZA: Sisso, state en parte che la siora la gà da tajar la carne.

MAMMA: Chi è che ha comprato carne?

SISSO: Gnisuni ha comprà carne.

MAMMA: Devo guardare in frigo se mi è rimasto un po' di fileto che lielo facio a mio filio che si tira un po' su... a quest'età...

SISSO: La me daga el cortel!

MAMMA: Giù le mani, maleducato! Che io chiamo la polisia.

SCIENZA: Fermate... tazi, fora se senti tuto!

SISSO: Allora nen fora dai cojoni e la smetemo con sta storia?

SCIENZA: No ormai l'ha dito che la vol narghe ela.

MAMMA: Il peto è anche buono, ma il cuore... ha proprio gusto di selvatico.

La MAMMA si pianta una coltellata nel petto e cade a terra.

A me mama da dieze ani i gavea proibio de usar i cortei.
 Sì, parchè zà na olta l'avea proa a tajarse fora.
 Sera bocia e l'avea catà davanti al speo col cortel en man.
 Da allora usemo solo piati e cortei de plastica.
 Ma ognuno gà la so maniera de svanir... ela en realtà che sempre piazuo i foresti, l'estero.
 L'aria anca voluo ciapar la patente. Par narsene ja... da chi...

SISSO: E adeso?

SCIENZA: Sisso, te s'è che no l'era mia previsto... aveene dito gnente armi, niente morti...

SISSO: Adeso ghe n'emo du de morti.

SCIENZA: Sisso, scapemo.

SISSO: En do scapemo se voleene tajarne fora.

SCIENZA: No so... decidi ti...

SISSO: Mi gò da decidar? Adeso mi gò da decidar. El bauco dei bauchi?

Zà dale elementari el Sciensa l'era en cor de leon.
 El ghè tiraa i sassi alla maestra e dopo el ghe dasea la colpa al Sisso.
 El Sisso allora el portaa dei fiori par scusare e el Sciensa el dicea che el ghe i avea portè lu. Finchè, en po' de ani dopo, l'ha pisà sula sela de la me bicicletta... e cossì ne semo conosui.

SISSO: Dai, Sciensa, descantate che gaven da nar. Scriven na letera che i sa copè a vicenda, i saluden e nen via.

SCIENZA: No se pol mia tajarse fora?

SISSO: No, da sta storia chi no se pol tirarse fora. Serene chi, aven visto tuto. Ti...
 t'è istiga so mama col cortel, ti te volee usar el cadavere del Bepi...
 SCIENZA: E volareseto dire che l'è colpa mia se no ne sen mia tirè fora.
 SISSO: No so. Quela l'è n'altra storia... l'è na storia più granda de noantri.
 SCIENZA: Anca sta toaja, anca sta television, sta casa i me par adeso più grandi de
 noantri. E la tera e la so polvare e le so raize, i sassi, i inseti... l'è più grande
 de noantri che no savemo gnanca da che parte tajar.
 SISSO: Ghè na sola roba da far, Sciensa...
 SCIENZA: Cossa?
 SISSO: Tajar. Svanir par tera, come le svaniò Bepi. L'è svaniò senza gnanca
 acorzarsene. L'è svaniò parchè no'l savea più en do nar... l'è na guera che
 no gà contorni...
 SCIENZA: L'è na guera che no emo mai combatuo...
 SISSO: L'è na guera che emo sempre sognà...
 SCIENZA: L'è na guera de mezo milimetro.
 SISSO: E alora tajemo.
 SCIENZA: Aspeta. No gheto mia paura de nar al'estero?
 SISSO: Pezo de chi no'l pol mia esar.
 SCIENZA: E ghe sarà modo de tajarse fora... anca al'estero?
 SISSO: Ghè sarà modo...
 SCIENZA: La domanda l'è sempre: come?
 SISSO: El Bepi el le saea. En scarsela gò catà qualcosa...
 SCIENZA: Te l'avee catà el discorso e no te me l'è mia dito...
 SISSO: No l'era gnente de emportante...

SISSO E SCIENZA prendono il coltello dalla MAMMA e uno alla volta si colpiscono.

PAR TERA SVANIÒ E NO L'ERA GNANCA LA ME ORA
 SE PODEA ASPETAR FIN A STASERA GHÈ BISOGNO DE MI
 PAR TERA SVANIÒ ME SE SPEGNI LA CICA
 TRA 'L SAON E LA TERA EN BEL PO' DE INVIDIA DE QUEI COME MI

CHE SON NATI CHI E SCRIVEMO LA STORIA
 CHE SEN NATI E MOREMO CHI
 PAR TERA SVANIÒ E GHÈ SPORCO PAR TERA
 LA MOQUETE NO DESMENTEGA LE COLPE CHE GHERA
 BISOGNA TAJARSE FORA

VAO AL'ESTERO NE L'ADE DEL VENETO
 MI CHE SO INDIANO ME SENTO MORIR
 VAO AL'ESTERO NE L'ADE DEL VENETO
 MI CHE SO INDIANO ME SENTO MORIR

Mama, Sisso, Sciensa... e mi... semo tuti morti.
 Una dominica pomeriggio.
 Semo morti tuti quanti. Tuti de morte naturale. No ghè sta violensa.
 L'era solo na dominica pomeriggio che no saveene mia sa far.
 Saveene solo che oltre la strada che ne magna le rue dela machina gh'era l'estero.
 Ne voleene tegnà la nebia a scaldarne.

Adeso gò da far. Adeso che son al'estero.
Gò da verzar la porta de casa mia e sifolar ne le recie dela gente.
Come fa el vento, che te brina la schena.
Semo morti en silensio, come no fussene gnanca nati.
No ia parla de noantri al telegiornal, no ja parla dei nostri sogni, dei nostri cortei.
Ci sa sa i pensarà che avaren combinà.
L'è el cuore che gà sto gusto de selvadego.

BEPI si tinge con il sangue dei cadaveri, come un pellerossa. Buio.